

Gareth Evans-Jones



Dwedwch ychydig wrthym am y llyfr?

Mae *Llanddafad* yn gyfrol o 12 stori fer sy'n dilyn hynt a helynt y defaid a'r holl anifeiliaid difyr – a direidus – eraill sy'n byw yn Llanddafad yn ystod blwyddyn gron.

Ble cawsoch chi eich geni a'ch magu?

Cefais fy ngeni yn yr hen Ysbyty Dewi Sant ym Mangor (lle mae Matalan heddiw!) a'm magu yn Nhraeth Bychan, Ynys Môn. Mi es i Ysgol Llanbedrgoch ac Ysgol Goronwy Owen, Benllech, cyn mynd i Ysgol Syr Thomas Jones, Amlwch (yr ysgol uwchradd fwyaf gogleddol yng Nghymru).

Beth oeddech chi eisiau bod ar ôl tyfu fyny?

Roeddwn i wir eisiau bod yn ocsiwnâr.

Pa un oedd eich hoff lyfr pan oeddech yn blentyn?

A dweud y gwir, doeddwn i ddim yn darllen llawer pan oeddwn i'n blentyn (a dwi'n difaru peidio â gwneud), ond un llyfr roeddwn i'n ei ddarllen ac yn ei fwynhau oedd fersiwn Gwyn Thomas o *Y Mabinogion*, ac roeddwn i'n ffan o gyfres Harry Potter hefyd.

Beth yw eich diddordebau?

Dwi'n hoffi sgwennu, mynd am dro, darllen, nofio, gwyllo ffilmiau, theatr, caiacio, a mwydro!

Beth sy'n eich gwneud chi'n hapus?

Bod efo teulu a ffrindiau, mynd â Nowsyn, fy nghe defaid, am dro, sgwennu, darllen, a dysgu.

Beth sy'n eich gwylltio chi?

Pan dydi pobl ddim yn trin ei gilydd yn deg.

O ble rydych chi'n cael eich syniadau?

O bob man. Mae profiad personol yn storfa lawn o straeon. A dweud y gwir, roeddwn i wedi dychmygu *Llanddafad* pan oeddwn i'n blentyn a minnau wedi fy magu ar dyddyn defaid; ro'n i'n dychmygu bob math o straeon a chymeriadau i'r defaid i gyd – ac mae rhai ohonyn nhw bellach yn y gyfrol ei hun!

Oes gennych chi gyngor i rywun sy'n trio ysgrifennu?

Ewch amdani! Sgwenwch, darllenwch, a mwynhewch. Mae'r dychmyg yn anrheg mor werthfawr inni gyd.

Beth yw'r peth gorau / gwaethaf am fod yn awdur?

Y peth gorau ydi gallu byw efo cymeriadau am gyfnodau estynedig, fel petaen nhw'n ffrindiau newydd neu'n aelodau o'r teulu. Felly hefyd, dwi wrth fy modd yn cynnal gweithdai sgwennu mewn ysgolion, clybiau ieuenctid, canolfannau a gwyliau. Mae gweld pobl yn rhoi gofod i'w creadigrwydd ac yn creu rhywbeth yn brofiad tu hwnt i eiriau.

Cwestiynau Cyflym

Hoff gymeriad o lyfr?

Cwestiwn anodd! Ga i ddau? O ran llyfrau Cymraeg: Gwydion (o'r Mabinogion) a Wil Cwac Cwac.

Hoff le?

Adra! A Mynydd Bodafon, Ynys Môn!

Hoff fwyd?

Bwyd Eidalaidd. Hoff jocled: Toblerone – trîf bob Dolig a phen-blwydd!

Hoff ffilm / rhaglen deledu?

Cwestiwn anodd... Ella cyfres Lord of the Rings.

Hoff air?

Clwydo.

Superpower o ddewis?

Y gallu i teleportio, er mwyn gofalu na fydda i'n cyrraedd yn hwyr i lefydd.

Hoff rwydwaith cyfryngau cymdeithasol?

Instagram.

Beth sy'n gwneud i chi wenu?

Lot o bethau, ond un sy'n gwneud imi wenu'n aml iawn ydi fy nghe defaid 5 mis oed: Nowsyn Jôs.

Swydd tasech chi ddim yn awdur?


Swydd ddelfrydol?

Rydw i wrth fy modd yn dysgu myfyrwyr am Athroniaeth a Chrefydd, a chlywed eu syniadau a'u safbwyntiau yn fy swydd fel darlithydd ym Mhrifysgol Bangor. Mae gallu sgwennu ar ben hyn yn wirioneddol arbennig.

Top tip i ddarpar awduron?

Sgwenwch, darllenwch lwythi o wahanol fathau o lyfrau, a mwynhewch!

Lleucu Gwenllian



2025

Ble cawsoch chi eich geni a'ch magu?

Dan haul tanbaid Blaenau Ffestiniog.

Beth roeddech chi'n ei hoffi neu'n ei gasáu am yr ysgol?

Roeddwn i'n hoffi dysgu, ond yn casáu gorfod siarad o flaen y dosbarth. Lot gwell gen i roi fy mhen mewn llyfr.

Beth oeddech chi eisiau bod ar ôl tyfu fyny?

Artist, wedyn dylunydd ffasiwn, wedyn *interior designer*, wedyn gwyddonydd, ac wedyn artist unwaith eto.

Pa un oedd eich hoff lyfr pan oeddech yn blentyn?

Mae'n amhosib dewis! Roeddwn i'n caru cyfresi Harry Potter, Percy Jackson ac Inkheart, ac yn hoff iawn o *Hi yw fy Ffrind*, *Chwaer Fawr Blodeuwedd*, *Drwy'r Darlun*, *Eira Môn*, *Eira Mawr*...

Beth yw eich diddordebau?

Darllen, dysgu ieithoedd a dringo mynyddoedd.

Beth sy'n eich gwneud chi'n hapus?

Brechdan gaws ar ben mynydd.

Beth sy'n eich gwylltio chi?

Pobl sy'n methu ciwio.

Pryd ddechreuoch chi feddwl am fod yn ddarlunydd?

Dwi'n meddwl 'mod i eisiau bod yn artist erioed, ond roedd cyfnodau pan wnes i golli hyder wrth feddwl am gael gyrfa ym myd celf. Mae'n siŵr 'mod i wedi dechrau meddwl am ddarlunio yng Ngholeg Meirion Dwyfor, ac wedyn darlunio llyfrau plant yn benodol yn y brifysgol.

O ble rydych chi'n cael eich syniadau?

Nunlle'n benodol, ond pob man hefyd. Mae talu sylw i eiliadau bach, di-nod bywyd bob dydd yn ffordd wych o gael syniadau.

Oes yna themâu / pynciau arbennig sy'n apelio atoch?

Straeon am deulu a chyfeillgarwch, natur, hud a lledrith, a chwedloniaeth.

Oes gennych chi gyngor i rywun sy'n trio darlunio?

Mae hyn 'chydig bach yn od, ond dwi'n meddwl ei fod yn rili bwysig trio gwneud rhyw fath o ymarfer corff. Dydi plygu dros ddesg am oriau bob dydd ddim yn dda i'ch asgwrn cefn a buan iawn mae'n dechrau brifo.

Beth yw'r peth gorau / gwaethaf am fod yn ddarlunydd?

Y peth gorau ydi gallu ymgolli mewn gwahanol fyd am oriau bob dydd, a chael y pleser o fod yn un o'r bobl gyntaf i ddarllen gwaith awdur.

Gall fod yn yrfa reit unig, a gall hyn fod yn anodd weithiau, ond ar adegau eraill mae'r llonyddwch hwn yn fendith.



Cwestiynau Cyflym

Hoff lyfr o'ch plentyndod?

Alla i ddim dewis!!

Hoff gymeriad o lyfr?

Luna Lovegood.

Hoff le?

Copa Moelwyn Mawr.

Hoff fwyd?

Caws ar dost.

Hoff ffilm / rhaglen deledu?

Nausicaä of the Valley of the Wind.

Hoff air?

Kokoška ('iâr' yn iaith Macedonia).

Superpower o ddewis?

Gallu stopio amser (a chael mwy o amser i ddarllen a darlunio).

Hoff rwydwaith cyfryngau cymdeithasol?

Ddim un...

Beth sy'n gwneud i chi wenu?

Fy nghŵn, Celt a Tufi – maen nhw mor wirion!

Swydd tasech chi ddim yn ddarlunydd?

Swydd ddelfrydol?

Dim syniad! Rhywbeth fyddai'n golygu treulio lot o amser yn crwydro mynyddoedd, ella.

Top tip i ddarlunwyr y dyfodol?

Peidiwch â gadael i neb ddinistrio eich hunanhyder.